



鳴鳳古道

高速公路頭份交流道下，踰臺13線行往下，過明德水庫五百公尺邊仔左幹苗22線，還愛再踰該條路蹶八公里。左片路脣，會看著高高个油井、闊闊个煉油廠，右手山壠還有顯顯个恩主公、有分人問事个濟世宮，歡迎您來蹶山。柚仔坑、茶亭、蕃仔寮這兜老地名，高天天个大樹、圖牆肚个伯公，寫等百過年來這位个歷史；廢忒个炭礦、分人挖忒半垵山仔个玻璃砂，同偲俚講等佢四、五十年前乜識有過个繁華。翻過一隻山頭，轉過兩隻彎幹，偲个車仔就蹶到山仔个盡嶺頂了。

企在山頂个雲洞宮看往出，山排一層又一層。白雲樂樂仔園在山排肚，山排柔柔仔憑在白雲肚，無愁無慮。層合層个山排下有一片平洋，該係苗栗市；天時好个時節，遠遠、金金金、一瞞一瞞仔摺偲相借問个係臺灣海峽。企在這位伸一下懶筋、放一下大氣，偲就愛在廟脣个細路仔起勢運動了。

鳴鳳古道，就在這位行起勢三點五公里。一路行來，大體係碇仔、下崎，有百年个香絲樹、樟樹摺偲遮蔭，涼風、樟腦味緒做伴，鳥仔、蟬仔不時唱歌仔鬥鬧熱，成時還會有細毛蟹仔對山坑水行出來偷看人。這一碇碇壁蹬个路，係六、七十年前个人，日日愛摺一擔一擔个檳柑、一簍一簍个茶米、雜貨挨往下、箭往上个路。行過柑仔園、再過一板線橋，獅潭个群山，早早就畫好一幅靚靚个水墨山色在該等偲了。

頭屋、獅潭、公館中央八角嶺山肚个這條山路，係無多兩百年前，賽夏族人打獵个山路；係「擎得起鑊頭，就愛同大人掙手做事」个頭擺人挨擔上下个路。這下，山風、大石、恬靜、無愁慮，就留一頭頭个大樹來註記時間定定。

寮日，渡大人細子去該位蹶山，煩勞會散、心會開；還有茶米好買、仙草好食，寒天个柑仔、轉熱時个桃仔、李仔。大熱該下，公館个紅棗就愛大出了。該還等麼个？準備來去蹶山了！

作者：彭瑞珠

☆詞彙學習☆

- | | |
|-------------------------------|--------------------------|
| 【行往下】hang' gong' ha'：往下走、往南走。 | 【香絲樹】hiong' xi' su：相思樹。 |
| 【恩主公】en' zu' gung'：關聖帝君。 | 【碇仔】don e'：階梯。 |
| 【問事】mun sii：問卜、遇事求神幫助。 | 【山坑水】san' hang' sui'：山溪。 |

☆文法學習☆

【無多……】mo' do'：頂多、不超過……。後加數量詞，表示事物的時間、距離、數量等，接近而尚未超過某個量。

例1：飯盆頭个飯，伸無多兩碗，怕會毋罇食。（飯鍋裡的飯，剩下頂多兩碗，可能會不夠吃。）

例2：佢當煞猛，大學讀無多三年，就畢業了。（他很用功，大學讀了不過三年，就畢業了。）